

Títulu

**Promosaun Boa Governasaun no Kombate Korupsaun iha Timor-Leste :
Perspetiva Pesoál**

Naran Autor :

Judelio da Silva Barros Barreto

Idade :

23 anos

Eskola :

Universidade Nasional Timor Lorosa'e (UNTL)

Submete ba :

Komisaun AIM no PDHJ

Submete husi :

Judelio Da Silva Barros Barreto

Email: barretojudas010@gmail.com

Nu. Telf : 74205001

Data : 29 Novembro 2024

Kontajen liafuan :

Entre 2000 liafuan

Títulu : Promosaun Boa Governasaun no Kombate Korupsaun iha Timor-Leste : Perspektiva Pesoál

Introdusaun

Boa governasaun no anti-korupsaun importante tebes hodi promove dezvoltimentu sustentável, dame, no prosperidade iha nasaun ida. Mai ha'u, boa governasaun representa prinsípiu transparénsia, responsabilidade, ekuidade, no respeito ba lei, ne'ebé garante katak instituisaun públiku sira halao servisu ba povu nia interese ho efektivu no justu. Iha parte seluk, korupsaun, ne'e hanesan hahalok ne'ebé destrui konfiansa iha instituisaun sira, halo distribusaun rekursu la ekuitativu, no aumenta pobreza ho dezigualdade. Timor-Leste hanesan nasaun demokrásia foun ida ne'ebé foin ukun-an husi luta resisténsia durante tinan barak, atu estabelese boa governasaun no kombate korupsaun sai hanesan dezafiu ida ne'ebé kompleksu maibé presiza rezolve urjente. Iha essay ida-ne'e, hau hakarak diskuti tema boa governasaun no anti-korupsaun iha kontekstu Timor-Leste, impaktu husi korrupsaun ba indivídiu, família, no comunidade, no apresenta mós maneira ida ne'ebé hau bele halo hodi kontribui rezolve problema ida-ne'e.

Kontestu : Governasaun no Korupsaun iha Timor-Leste

Depoizde okupasaun no konfliktu iha tinan naruk, Timor-Leste konsege hetan independénsia iha tinan 2002. Hanesan nasaun foun ida iha mundu, Timor-Leste enfrenta dezáfriu barak atu konstrói instituisaun forte no dezenvolve ekonómia sosiál. Maski nasaun ne'e halo progresu di'ak, hanesan estabilidade polítika no kria kresimentu ekonómia liuhusi fundu petrolíferu, boa governasaun no korupsaun sei sai hanesan kestaun ne'ebé presiza tau-matan.

Tu'ir Transparency International Corruption Perceptions Index, Timor-Leste konsistentemente hetan pontu/valor iha nível klaran até okos liu, ne'e haktuir katak nasaun ne'e kontinua enfrenta korupsaun ne'ebé buras ba beibeik iha administrasaun públiku no prestasaun servisu (Transparency International, 2022). Jestaun ladiak ba reseíta petrolíferu, infrastrutura inadekuadu no lei anti-korupsaun ne'ebé la forte sai hanesan kestaun ne'ebé presiza tau-matan kuandu hakarak hadia nasaun ne'e. Iha fatin ne'ebé hau-nia hela, impaktu korrupsaun boot loos, insitutuisaun governu ne'ebé prátika aktu korupsaun hodi hatudu injustisa, osan aloka ba eskola, saúde, no estrada la to'o ba benefisiáriu (povu) ne'ebé merese atu hetan no autoridade sira ne'ebé mak egoista hodi habosu an no família sein prioriza bem-estar povu.

Dezenvolvimentu

1. Efeitu husi Korupsaun iha Timor-Leste ba Ha'u, Família no Komunidade

Korupsaun nafatin sai hanesan problema boot iha Timor-Leste, ne'ebe fó impaktu siknifikativu ba konfiánsa públiku no dezvoltimentu ekonómiku. Índise de Persesaun Korupsaun Transparénsia Internasional konsistentemente klasifika Timor-Leste iha nível ladiak, hatudu sinal katak ita iha nível korupsaun aas iha setor públiku (Transparénsia Internasional, 2023). Tipu korupsaun ne'ebe komun akontese iha nasaun ida ne'e mak inklui korupsaun, nepotizmu, subornu iha kontratu

públiku sira, no jestaun ladiak Fundu Petrolíferu, ne'ebe sai hanesan fonte prinsipál husi reseitas Timor-Leste.

Husi ha'u-nia haree hanesan sosiedade, normalizasaun korupsaun mós hamosu bareira ida ne'ebé siknifikativu. Iha comunidade barak, ema haree korupsaun ne'e hanesan "buat aat ne'ebé nesesáriu" hodi garante favor ruma. Hanoin ida ne'e, hun mai husi instabilidade polítika iha tinan barak nia laran, hamosu difikuldade boot atu promove kultura responsabilizasaun no transparénsia. Ema barak, inklui ha'u-nia an rasik, haree ho matan oinsá comunidade tolera prátika aktu korupsaun hodi hetan asesu ba servisu báziku, sein konsiente katak ida ne'e sei haburas siklu korupsaun iha rai ne'e. Nu'udar ezemplu, bainhira ha'u ba trata ha'u-nia dokumentu pasaporte iha fulan hirak liu bá, funsionáriu sira dehan katak blanku hotu. Entaun ha'u hetan ha'u-nia kolega ida ne'ebé mós trata pasaporte maibé nia dehan mai ha'u atu fó deit osan oituan ba ema iha laran hodi bele trata dokumentu lalais no la presiza hein blanku mai. Ezemplu ne'e hanesan istória ida husi akontesimentu barak ne'ebé halo normalizasaun ba aktu korupsaun hanesan subornu ne'ebe akontese iha fatin barak liuliu iha fatin servisu atendimentu públiku. Ha'u rasik tanba deit menus osan, labele asesu hodi trata pasaporte ne'ebé rezulta ha'u labele halo viajen hodi ba vizita ha'u-nia familia iha Indonesia. Dezigualdade ida ne'e akontese ba ha'u rasik no halo ha'u labele asesu ba ha'u-nia direitu ba atendimentu públiku ne'ebé justu. Kazu hanesan ne'e barak tebes mosu iha fatin servisu atendimentu públiku (fatin trata pasaporte, karta kondusaun, dokumentu motor no kareta nst).

Aleinde ne'e, ambiente polítiku mós haburas klientelizmu no nepotizmu ba nomeasaun públika, ne'ebé tuirmai sei hamihis valor meritokrásia no atraza dezvoltamentu instituisaun governasaun ne'ebe efektivu. Ha'u-nia amigo barak mak lakon konfiánsa ba instituisaun públiku sira no prefere liu aplika vaga ba iha Organizasaun Não Governamental (ONG) no barak mak prefere liu ba servisu iha rai-liur tanba sira-nia perspetiva katak, atu konkere ba vaga públiku iha instituisaun governu nian, sira presiza iha relasaun partidária ka familia ho ema ruma iha instituisaun refere. Aktu nepotizmu ida ne'e realidade akontese iha instituisaun governu hotu-hotu, no ida ne'e hamosu injustisa no halakon direitu povu inklui ha'u-belun sira ne'ebé hakarak asesu ba oportunidade hanesan. Ema ne'ebé iha poder ka influénsia fó favor ba sira-nia família ka maluk sira, liuliu fó servisu sein haree ba kapasidade maibé haree ba relasaun família no partidu polítiku. Aktu sira hanesan ne'e mak kontribui makas ba servisu públiku ne'ebé inefektivu no laiha qualidade, tanba prosesu rekrumentu la buka ema ne'ebé bá kualifikadu husi aplikante sira maibé haree mak relasaun pesoál.

Jestaun ladiak ba rekursu petrolíferu mós afeta planejamentu ekonómiku no esforsu sira hodi hamenus kiak liuhusi dada fundu husi setor importante sira hanesan saúde, edukasaun no infraestrutura. Maske laiha data ne'ebé fó klaru kona-ba utilizaun fundu petrolíferu ne'ebe laloos, maibé tuir estudu ne'ebe halao husi La'o Hamutuk, hanesan organizasaun sosiedade sivil timorensé, hateten katak jestaun ladiak ba Fundu Petrolíferu kauza menus investimentu ba iha bein-estar públiku, aumenta tan kiak no no dezigualdade iha nasaun ne'e (La'o Hamutuk, 2021). No mós, prevalensia husi korupsaun hamihis konfiánsa públiku ba instituisaun governu, ne'ebe kauza privasaun direitu no hafraku prinsipiu demokrátiku. Tuir ha'u nia perspetiva, asaun balun ne'ebé reflète uza fundu petrolíferu ne'ebe ladiak mak hanesan bainhira ita utiliza orsamentu fundu ne'e

nian ba servisu ne'ebé la fó benefisiu ba bein-estar komun. Nu'udar ezemplu, membru parlamentu nasionál tenta atu sosa kareta foun ne'ebé gasta millaun dolares, ne'ebé tuir lolos la nesesáriu. Envezde sosa kareta foun, diak liu utiliza osan sira ne'e hodi hadia infrastrutura báziku hanesan iha area edukasaun, saúde (atualmente falta ai-moruk) no agrikultura ne'ebé sai hanesan fator importante ba dezentvolvimentu nasionál. Bainhira uza fundu lalos, ami povu mak nafatin hetan terus hanesan limitasaun asesu ba saúde ne'ebé qualidade, atendimentu públiku falla hela, agrikultura depende ba eksportasaun, infrastrutura la lao ka laiha qualidade nst.

2. Boa Governu Hanesan Dalan Atu Hadia

Boa governasaun bele rezolve problema-ne'e. Boa governasaun garante katak rekurau uza ho efisiente, servisu públiku iha responsabilidade, no sidadaun bele partisipa iha prosesu foti desizaun. Iha Timor-Leste, medida barak mak halo ona atu atinji ida ne'e, liuhusi forma instituisaun hanesan CAC (Komisaun Anti-Korupsaun), PDHJ (Provedória Direitus Humanus no Justisa) nst. Inisiativa sira ne'e kria hodi hodi reforsa transparénsia iha finansas públika no hadia prestasaun servisu (Governo de Timor-Leste, 2021). Maibé implementasaun sei iha fraqueza. Por ezemplu, maske jestaun fundu petrolíferu nian sai hanesan reseitas esensíal, maibé falta planeamentu ne'ebé la'o tempu naruk tanba kada eleisaun governu sempre troka ho programa ne'ebé foun. Hanesan mós ho CAC, maske hanesan instituisaun independente, maibé iha realidade sei iha kahur polítika no partidáriu iha laran ne'ebé halo instituisaun ne'e lakon ne'e nia poder no direitu. Haforsa jestaun tempu naruk nian ba reseitas esensíal nian, sei garante rikeza Timor nian sei benefisía populasaun hotu, liu-liu sira ne'ebé mak vulnerável no kria orgaun independe ne'ebé forte sein kahur polítika sei ajuda halao servisu ne'ebé independe no justu.

3. Oinsá Ha'u Bele Kontribui hodi Kombate Korupsaun

Kombate korupsaun presiza esforsu kolektivu, no hanesan sidadaun foinsa'e iha Timor-Leste, ha'u fiar katak ha'u iha responsabilidade pesoál hodi kontribui ba misaun ne'e. Pasu primeiru ba luta ida ne'e mak hasae konsientizasaun kona-ba efeitu husi korupsaun iha ha'u-nia comunidade. Liuhusi envolve iha diskusaun, organiza workshop, no utiliza sosiál media, ha'u bele enkoraja maluk sira seluk hodi hatene impaktu husi korupsaun ba sidadaun-nia moris no importánsia atu ezize responsabilidade husi líder sira.

Aleinde ne'e, ha'u bele promove edukasaun sívika ba ha'u-nia maluk sira, liuliu hanorin malu kona-ba direitu sidadaun nian no oinsá utiliza feramentu sira ne'ebe disponível hodi keixa kazu korupsaun. Ema barak iha ha'u-nia comunidade mak la hatene kona-ba mekanizmu sira ne'ebé iha, hanesan CAC ka provedor justisa sira seluk, ne'ebé harii atu kombate prátika korupsaun. Liuhusi ajuda ema seluk hatene kona-ba oinsá atu utiliza kanal sira ne'e, ha'u bele empodera sira hodi foti asaun kontra korupsaun.

No mós, ha'u bele kontribui ba esforsu anti-korupsaun liuhusi partisipa ativamente in organizasaun sosiedade sivil sira ne'ebé promove Boa Governasaun. Organizasaun hanesan La'o Hamutuk , Fundasaun Mahein no Provedoria Diretu Umanu no Justisa (PDHJ) ne'ebé iha papel importante hodi promove transparénsia no fó sai kazu korupsaun iha nasaun ida ne'e (Fundasaun Mahein, 2022). Envolve an iha organizasaun sira hanesan ne'e, fó dalan mai ha'u hodi partisipa ativa iha

atividade sira ne'ebé monitoriza asaun governu, avalia gastu públiku no fó presaun ba reforma legislativu.

Ikus liu, lidera liuhusi hatudu ezemplu mak hanesan dalan ne'ebé fó impaktu boot liu hodi enkoraja integridade iha sociedade. Nu'udar ema ne'ebé iha mehi hakarak servisu iha atendimentu/servisu públiku, ha'u iha prinsípiu hatudu étiku diak, responsável no transparénsia iha ha'u nia aspetu servisu no interasaun sira. Liu husi hatudu ezemplu diak, espera bele inspira maluk sira iha ha'u nia comunidade, liuliu jersaun foun sira, atu adota valor onestidade, responsabilidade no dedikasaun ba bein-estar komun.

4. Lisaun husi Analiza Komparativu

Mai ha'u importante tebes atu ita halo “Analiza Komparativu” ho nasaun pós-konflitu seluk ne'ebé konsege kombat korupsaun no harii boa governasaun iha sira-nia rai, atu nune'e ita bele foti hela lisaun importante ruma ne'ebé bele ajuda Timor-Leste. Nasaun Rwanda, nu'udar ezemplu, iha ona progresu siknifikativu hamenus korupsaun liuhusi estabele kuadru governasaun ne'ebe sólidu, promulga lei anti-korupsaun no enfatiza prátika kontratasaun meritokrátika iha administrasaun públika (Bureau Asuntu Afrikanu, 2021). Timor-Leste bele estuda no adota estratéjia balun husi Rwanda hodi bele haforsa administrasaun públiku liuhusi fó prioridade rekrutasaun bazeia ba prestasaun no dezenvolve matadalan ne'ebé klaru ba nomesaun públika hodi hamenus nepotizmu.

Konkluzau

Boa governasaun no kombat korupsaun nu'udar pilares importante ba progresu Timor-Leste no bein-estar povu. Korupsaun laos estraga deit demokrásia, maibé ameasa mós estabilidade no kresimentu ekonómia, afeta povu-nia moris inklui ha'u-nia comunidade, iha ne'ebé rekursu limitadu no servisu dalabarak insuficiente. Atu atinji boa governasaun iha Timor-Lest, sei prezisa reforma estruktural no mudansa kultura ne'ebé valoriza transparénsia, responsabilizasaun no inkluzau.

Boa governasaun no anti-korupsaun importante tebes ba Timor-Leste nia desenvolvimentu sustentável. Korupsaun ne'e rasik halakon konfiansa públiku, estraga rekursu sira no hamosu deziguldade ne'ebé afeta individiu, família no comunidade. Transparénsia, responsabilizasaun no envolvimentu sidadaun, bele ultrapasa obstákulu sira ne'e hodi ba future ne'ebé nabilan. Liuhusi edukasaun sívika, envolvimentu comunidade no integridade pesoál, ha'u bele kontribui ba Timor-Leste ida ne'ebe responsável no transparente liu. Nasaun ne'e sei kontinua harii hela nia instituisaun, kada sidadaun iha papel importante atu ezize responsabilizasaun no halo advokasaun ba governasaun ida ne'ebe étiku. Liuhusi servisu hamutuk hodi kompate korupsaun, Timor-Leste bele kumpri promesa independénsia nian no kria sociedade ida ne'ebé sidadaun hotu iha asesu ba oportunidade no hatoo sira nia lian hodi harii futuru ne'ebé diak ba ema hotu.

Rekomendasaun

1. Reforsa Instituisaun Anti-korupsaun

Aumenta fundu no hamenus intervensaun polítika iha Komisaun Anti-Korupsaun (CAC) sei permite instituisaun ne'e atu halao servisu independente no efisiente liu tan. Mudansa ne'e nesesáriu tebes hodi bele hasae kapasidade komisaun ne'e atu investiga no prosesa kazu korupsaun, promove responsabilizasaun ba nível governamental sira hotu.

2. Promove Edukasaun Sívika no Halao Kampaña hodi hasae Konsientizasaun

Lansamentu kampaña sensibilizasaun ne'ebé fó sai kona-ba impaktu negativu husi korupsaun no valor husi boa governasaun bele ajuda muda persepsaun públiku. Edukasaun Sívika iha eskola no comunidade tenki foku ba iha importánsia husi transparénsia, responsabilizasaun no partisipasaun sidadaun.

3. Hatudu Transparénsia iha Gastu Públiku

Implementasaun mekanizmu ba auditóriu regular no divulgasaun públika kona-ba kontratu no despeza governu nian bele hasae konfiansa públika no hatudu responsabilizasaun. Bainhira sidadaun bele asesu ba informasaun ne'e liuhusi plataforma dijital, bele ajuda sira deteka fundu públiku sira ne'e uza hodi halo ba saida deit, dalan ida ne'e bele ajuda hamenus prátika korupsaun.

4. Empodera Média no Sociedade Sivil

Garante Liberdade emprensa no suporta organizasaun sociedade sivil importante tebes hodi promove transparénsia. Presiza haforsa protesasaun legal ba jornalista no ativista hodi fó dalan ba sira atu halao servisu sein tauk, permite sira hodi revela kazu korupsaun no husu responsabilizasaun husi koruptor sira.

5. Investe iha Treinamentu/Kapasitasaun

Dezenvolvimentu kapital umanu liuhusi edukasaun no programa treinamentu sei bele ajuda hasae kapasidade ba iha operasaun instituisaun públiku sira no aumenta efikásia estrutura governasaun.

6. Reforsa Transparénsia iha Kontratu Públiku:

Implementasaun sistema governasaun eletrónica ba kontratu públiku bele ajuda hamenus oportunidade ba komete desviu fundu no favoritismu.

Bibliografia

Transparency International. (2022). **Corruption Perceptions Index 2022**. Retrieved from <https://www.transparency.org/en/cpi/2022/index/tls>

Transparency International. (2023). *Corruption Perceptions Index 2023*. Transparency International. Retrieved from <https://www.transparency.org/en/cpi/2023>

La'o Hamutuk. (2021). *Petroleum Fund Transparency in Timor-Leste*. Retrieved from <https://www.laohamutuk.org/>

Government of Timor-Leste. *Public Financial Management Reform Plan (2021)*. Retrieved from <http://timor-leste.gov.tl/>

Fundasaun Mahein. (2022). *Civil society's role in anti-corruption efforts*. Retrieved from <https://www.fundasaunmahein.tl>

Bureau of African Affairs. (2021). *Anti-Corruption and Accountability in Post-Conflict Governance*. U.S. Department of State. Retrieved from <https://www.state.gov/>